

Goibekokale

ELGETA / Barikua / 2006ko Urtarrilaren 13a / 252. zenbakia

KOORDINATZAILEA: Irati Agirreazaldegia • Barrenkalea 33 BERGARA 20570 • Tel.: 943 25 05 02 • Faxa: 943 25 05 13 • Posta elektronikoa: goibekokale@goiena.com • Lege gordailua: SS475/95

Hiru baserri-bide Udalarenak izatea eskatu diote Aldundiari

IRATI AGIRREAZALDEGI

Elgetako baserri-bide gehienak Udalarenak badira ere, hiru Gipuzkoako Foru Aldundiaren esku daude. Hala, Udalak eskaria egin dio Foru Aldundiari bide hauek Udalaren eskutara pasatzeko. Bestalde, baserri-bideen erabilerara arautzeko proposamena ere egitekotan dira.

Larragibel, Egoetxeaga eta Arantzeta Zeharra auzoetako bideak Gipuzkoako Foru Aldundiarenak dira gaur egun. Eurena da bideok modu egokian mantendu eta zaintzeko ardura ere. Udalak nahi du baserri-bide hauen titularrak bera izatea, eta hori eskatu dio, hain zuzen ere, Aldundiari.

Bideen eskuduntza Udalarik pasa aurretik, ordea, Foru Aldundiak berak konpondu egin behar litzuke. Baserri-bideetan aglomeratua botako lukete, eta honela, gutxi gorabehera 15 urterako modu egokian mantenduko lirarteke bideak. Udalaren asmoa da hitzarmena lehenbailehen egitea eta bideak ahalik eta denbora tarte laburrenean konpontzea.



IBAN ARANTZABAL

Besteak beste Larragibel auzora doan bidea bereganatu nahi du Udalak.

PINUAK

Bestalde, pinudien jabeek pinuak ateratzen dituztenean, baserri-bideak erabiltzeagatik ordaindu ohi duten fidantza aldatzeko

asmoa azaldu zuten azken Baserriarren batzordean.

Kamioiak igarotzeagatik tasa bat ordaindu behar dute pinudien jabeek. 1990ean jarri zituzten zen-

batekoak eta horren arabera kamioi bakoitzak kilometroko eta bidaiako sei euro ordaindu behar ditu.

Honetaz gain, beste horrenbesteko fidantza ordaintzea dago jabeek. Fidantza hau erabiliko da kamioiek kalteak eraginez gero (lurra bota eta arekak zikindu, bideak zulatu...) konponketak egiteko.

ORDENANTZETAN ALDAKETAK

Kontuan hartuta batzuetan fidantza hori ez dela nahikoa izaten kalteak konpontzeko, Baserriarren batzordean proposatu dute gutxieneko kopuru bat zehaztea. Hain zuzen, kopuru hori 600 euro izatea da proposamena.

Hala ere, gai honen gaineko udal ordenantza zaharra denez, gainbegiratu egin dute, baita beste herri batzuetakoak aztertu ere. Azterketaren ostean, erabaki dute aldatzeko egitea eta hurrengo Baserriarren batzordean aurkeztea.

Iaz, esaterako, Udalak 82.503 euro gastatu zituen baserri-bideak konpontzen; lanak oraindik amaitzeke daude.

LABUR

Ardoaren gaineko ikastaroa hilaren 18an KZgunean

Hilaren 18an aurtengo lehen ikastaroa izango da KZgunean. *Ezagutu ezazu ardoaren izenburupean, ordenagailuekin bitarteko saioa egingo dute ikastaroan izena ematen dutenek. KZgunea astelehenetik barikura bitartean egoten da zabalik 16:30etik 20:00etara. Irakaslea, berriz, ikastaroko egunean 09:00etatik 13:00etara bitartean egongo da zalanetik argitzeko.*

Gazte lokalerako begiralea behar du Udalak

Udalak begiralea behar du gazte lokalaren ardura hartzeko. 11 eta 16 urte bitarteko gazteendako egongo da lokala zabalik asteburuetan. Begiraleari esperientzia izatea, euskaraz jakitea eta 18 urtetik gorakoa izatea eskatuko zaio. Lan kontratua urtarrietik maiatzera bitartekoa izango da. Interesatuak udaltxerara jo behar dute.

KIROLA

Gabonetako Umeen Pilota Txapelketan, 28 neska-mutikok jokatu dute Uberako frontoian

I.A.

Herriko pilotalekua obretan bada ere, urteroko ohiturari jarraituz Umeen Pilota Txapelketa egin zuten Gabonetan.

Kirola sustatzeko taldeak eta Ozkarbi Pilota Elkartek antolatu zuten txapelketa. Abenduaren 28an, 30ean eta 31n jokatu zituzten partiduak 28 umek Uberako pilotalekuan.

Bost mailatan jokatu ziren partiduak eta finalen ostean Iñaki Ugarteburu Kirol batzordeko zinegotziak, Patxi Basauri alkatetik eta Jose Mari Zezeaga pilo-

tariak banatu zituzten sariak. Irabazleek garaikurra jaso zuten eta gainontzeko parte-hartzaileek kamiseta eta domina bana.

Juan Luis Ubera antolatzaileak esan digunez, "frontoian obretan daudenez, neska-mutiko gutxiago dabil pilotan, eta hori txapelketan ere sumatu dugu.

BI TXAPELKETA HASTEAR

Bestalde, Ozkarbiko pilotariak bi txapelketatan hartuko dute parte: Udaberri sarian eta Euskal Ligan. Lehen partiduak bihar, zapatua, jokatu dituzte Eskoriatzako pilotalekuan.



IÑAKI UGARTEBURU

Etor Telleriak gogoz jokatu arren, ez zuen finalerako txartelik eskuratu.

FINALETAKO EMAITZAK

AURRE BENJAMIN MAILA

• Neskak:
Jone Elkoro 16/Ane Ugarteburu 14

• Mutilak:
Etor Zubiaurre 16 / Unai Andres 8

BENJAMIN MAILA

• Neskak:
Ibane Zubiaurre 16 / Uxue Larrea 7

• Mutilak:
Jon Ugarteburu 16 / Josu Mañarikua 5

ALEBIN MAILA

• Maitena Mañarikua 16/Iñaki 5

INFANTIL MAILA

• Iñaki Olaortua 18/Mikel Beretxinaga 12

KADETE MAILA

• Odei Zenitagoia 18/
Mikel Agirregomezkorta 12

HEZKUNTZA

Haurreskola lekuz aldatu artean, aurrez hitzartu baino ume gehiago onartuko dituzte

I.A.
Hainbat gurasok haurreskolaren gainean azaldutako kezkak sumatuta, lanean jardun dute Aralarkoek eta behin-behineko irtenbidea aurkitu diote arazoari. Haurreskola lekuz aldatu bitartean muga gairatu arren, onartu egingo dituzte umeak.

Herriko zenbait guraso kezkatuta zeuden umeak haurreskolan lekurik gabe geratzeko arriskuan zeudela uste zutelako. Elgetako haurreskolan hamar umerendako lekua dago, eta oraingo lau plaza baino ez dauka libre.


Arazo honi irtenbidea aurkitzeko lanean jardun dute Aralarkoek: "Hasieratik apustua egin genuen haurreskolaren alde, garbi baitugu herriko umeak ezin

direla kalean geratu, eta familia eta lan mundua uzartzeko ahalguz berezia egin behar dela".

HIRU UMEREN GORABEHERA

Egindako lanak eta Haurreskolak partzuergoko arduradunekin izandako elkarrizketek eman dute fruitua. Aralarkoek eskatu zuten haurreskolak hamar umerendako tokia izan arren malgutasunez jokatzeko; hau da, bi edo hiru umeren gorabehera onartzeko. Partzuergokoek ontzat hartu dute neurria; eta haurreskola Torrealdean kokatu bitartean ume gehiago sartu ahal izango dira Maalako gelan. Hala ere, argi utzi dute espazio baldintza egokiak bete ezean leku aldaketa eskatuko dutela.

Oraingoz, beraz, gurasoek ez daukate kezkatzeko arrazoi sakinik, behin behineko irtenbidea bideratuta baitago.



Oraindik lau umerendako lekua dago haurreskolan.

ELIZA

Diru bilketa berezia egiten dihardute sakristiako teilatua konpondu ahal izateko

I.A.
Parrokiako sakristian obrak egin behar dituztela eta, asteburuan diru bilketa berezia egin zuten mezatan. Bestalde, kontu korrantea ere ireki dute Kutxan nahi duenak diru ekarpenak egin ditzan, obra hauen kostuari aurre egiteko.

Parrokiako sakristian teilaberitze-lanak egin nahi dituzte, eta lanok ordaintzeko eliztarren laguntza ezinbestekoa da.

Hori dela eta, diru bilketa egin dute asteburuan. Juan Kruz Juaristi apaizak esan digunez, "jende asko joan zen mezetara eta elizak egindako eskariari oso erantzun ona eman zioten. Gai-

nera, espero dugu aurrerantzean ere dirulaguntzak jasotzea". Horretarako, Kutxan 0105504443 zenbakidun kontua ireki dute, nahi duenak dirua sar dezan obra hauek egiten laguntzeko.

EGURREZKO EGITURA

Lanak udaberrian hasteko asmoa azaldu digu Juan Kruz Juaristik.

Oraingoz delako hamar urte inguru elizan berritze lanak egin zituzten, eta orain sakristiari iritsi zaio txanda. Teilatua berritzea izango da lan nagusia: "Egurrezko egitura denboraren poderioz hondatuz joan da, eta aldatu egingo dugu; beharbada teilak ere berriak ipiniko ditugu. Arrazoi nagusia itoginak saihestea da".



Ozkarbi elkarteko bazkideen batzarra urtarrilaren 18an

Ohiko data baino geroago, urtarrilaren 19an, egingo dute aurten Ozkarbiko bazkideek urteko bilera. Elkartean bertan izango da; lehen deialdia 20:00etarako egin dute eta bigarrena, 20:30erako. Gai garrantzitsuez berba egingo dutela eta, bazkide guztiei batzarrera joateko eskatu diete. Ohiko gaiez gain, baserritarrekin egindako tratua, erretiratu eta udalarekin izandako harremanak, kuota berriak, lehendakari berria aukeratzea eta tabakoaren legea izango dira hizketarako gaiak.

Iker Gonzalez 2006ko lehen debagoiendarra

Argazkian gurasoekin agertzen den mutikoa ia urte berriarekin batera, urtarrilaren 2an, jaio zen Arrasateko Eskualde Ospitalean. Iker Gonzalez Sanchez elgetarra da bera. 2006an jaio den lehen debagoiendarra da Iker, Cristina eta Juan Carlosen semea.

Bestalde, Elgetako parrokiari lau neska-mutiko bataiatu zituzten domekan: June Bolinaga, Lorea Gartzia, Aitana Zubeldia eta Pablo Egizabal, hain zuzen ere.

Elgetan, 2005ean 14 ume jaio ziren eta urtea hasi baino egin ez denean jadanik beste elgetar bat jaio da./I.A.

